

Also be eusem Komedi Team do esch es hür eso
d`Erna und au d`Liselotte die sind hüt ne do
sie händ gfunde das si das Johr Ferie nötig heige
drumm duet für einmol d`Silvia eusi Helge zeige

De Andreas Glarner und de Cedric Wermuth hergottsackeremänt
die send fang fasch jede Tag e de Medie presänt
jo also so hüffig wed die 2 chasch em Fernseh gseh
chöntsch fasch meine die währe verwandt met em Sven Epiney

Wo sech de King Roger z`Australie unde duet zum Sieger küüre
hani dänkt e sim Alter duet de jetzt no sin 3. Frühling gspüüre
gesch denn hingäge de Ammann Simi hüpfe über de Schanzetesch
jo do chasch nomme hoffe das es sin letschte Winter esch

Jetzt esch es au em Aargau sowit duet eus d`AZ informiere
d`Stadt Bade wot schiends de erschi Bletzer e eusem Kanton montiere
jo also wanner mech froged tüend die send doch ned ganz Bache
jä wot den de Geri Müller jetzt au no em Auto Selfis mache

D`Brugger Zwäsi Gugge ich fends schad die dut nümm äxistiere
und d`Konfettispalter die düend de Latärnlumzug eliminiere
also wenn z`Brugg d`Fasnacht no witer schrumpft jo den chönttis passiere
das die statt met Schinznach-Bad met eus Riniker wänd fusioniere

Sed em 9. Novämber bes jetzt duet mech nor ei Frog quäle
wie händ die z`Amerika nor de Donald Trump chönne wähle
los Donald do no en guete Rot vo eim os de Nöchi vo Brugg
nem der es Biespel am Grossrot Schlatter ond trett nach 4 Johr weder zrug

Es Loch es Loch es Loch es Loch es Loch e huffe Löcher
gli bohrt d`Nagra do er Region Löcher noch und nöcher
be eus z`Rinike send si scho fließig am grabe d`IG Bözbärg ohni Bohrturm gseht rot
do meint de Salm André los bliebed cool das get doch nor es paar Biotop

Met mim Hund gassi go am neue Leewäg esch wie ne schlemme Traum
e gschlagni Stund semmer onderwägs und mer send fang bem 3. Baum
los Bären hanni zu mim Liebling gseit er setzt grad en chline Huufe
also bes du alli Bäume dore hesch gang ich ed Tannegg eis go suufe

Jetzt wo das Asylantehus ändli euse esch freut sech de Gmeirot wie versässe
doch das met de sanfte Renovation das chönd er grad vergässe
jo händ er s`Gfüehl die z`Aarau düeged das Bougsuech akzeptiere
wenn sie be eusem Waldhus ned emol an Abou tüend toleriere

Ab em April do gang ich de nome no be eus en Volg ue go poschte
ond chaufe det de halb Lade leer egal was es duet choschte
und met de huffe Volgmärkli wo das get du ich wot ned prahle
duen ich den hende be de Poscht au no grad mini Rächlige zahle

Und zum Schluss darf ich euch no e tolli Mitteilig komuniziere
das Johr müend er eus usnahmswies e mole nüt spändiere
well eus em Komedi Team gots guet mir send alli gsund und zwäg
gänd lieber dene arme Sieche öppis vo de Opere Schänkebärg

Ond jetzt ganz zum Schloss do wett ich no de Silvia gratuliere
well Sie duet scho über 20. Johr eusi Helge kreiere
do sie em Vorjohr ehres Jubiläum gschwänzt het esch es leider nötig
ond ehres Gschänk das chonnt wie d`SBB jetzt halt ächli met verspötig

*Der Komedi*¹⁷

Wänd er me bsueche? Ich be dehei onder „www.komedi.ch“

Eine vo de Grüene e de Schwyz de het ganz e glättli Idee
de wot e paar Johr of de Stross nor no Elektroautos gseh
also lose mol liebe Balthasar das esch doch gar ned praktikabel
stell der vor das Gnosch wo das get met all de Verlängerigskabel